

# DR JUNG STAINLEMER



## In dären Ussgoob

Begriessig	2
Drummeliufftritt	3
Generaziooneverdraag	4
Rätselsytte	7
S Intärne	8

## Begriessig - Junge Stainlemer vo uns 3

Salamander Mitenander

Fascht isch dr neue Redaktion e chli d Chrott mit Spuggi im Hals stegge bliebe, wo sich dr Chefredagter über d Inhalt vom letschte junge Stainlemer ussgloh het. Ok, mängmool kömme mr sälber au nit immer druss bi däm wo mr mache aber mr hänn-, gänn-, und mache uns Mieh.

Mr versueche uns z erkläre: In unserne Tschöbb sin mir die ganz Wuche bemieht unserne Schieler Sache z erkläre, wo si sölle begriffe und verstoh. Euch gsehn mir jetzt in däm Stainlemer halt ebe als Versuechsmasse zums mol andersch azgoh.

Wie au immer. Mr hänn uns die Kritik vo ganz unde z Härze gnoh und das mol vor allem Sache verfasst, wo dr Tüllli au verstoht. Speziell hämmer neu e Rätselsytte kreiert.

Wytter sin natürlich dr Bricht vom Intärne, wo mr mit em Generationevertrag (dä het sogar dr Tüllli schomol miesse loobe) hänn lo verschmelze und dr Vorbricht übere Drummeliufftritt d Hailaits vo dere Ussgoob.

Vill Spass bim läse und wie gseit; mr gänn alles drmit alli alles verstöhn (aber wo käämte mr do au ane...).

Gruess

Herr L. und Herr M.


## Vorbricht zum Drummeliufftritt vo de Junge

Was füre Ufwand. Was füre Zyt. Für dä Drummeliufftritt het die Jungi Garde ächt öbis gleistet. Unter dr Leitig vo de Herre Hermann, Mesmer, Vetter und Isler isch giebt worde bis zum Umgheie. Sit dr Wiehnachte heisst das sicher zwei Iebige pro Wuche, drzue chömme no Vorbereitigsarbete für d Bühni, Kostüm, usw. E intensivi Zyt hämmer hinter uns.

Dennoch, das wo druss entstoht isch dr Ufwand allemal wärt. Dr Sound fägt ein wäg. Minutiös hämmer an de Finesse vo däm Stück gschafft - d Pfiffer sin nid zämme gsi, d Tamboure hän s Tempo vrschärft, d Binggis hän müesse dr Unterschid zwüsche renne und zügig laufe lehre... do isch einiges zämme cho. Jetzt,wenigi Dääg vor dr Premiere sin mr aber sattelfest. Dämentsprächend zfriede zeige sich au d Leithammel, wie zum Bispil dr Herr Mesmer, wo gfunde het: „Jungs, wenna e so tönt wie hüt Zoobe, los ich euch uf d Bühni.“ Und mit dere Ischätzung liggt är genau richtig. Dr Uftritt isch bühneriff. Er haut ein um und är macht au am Axel alli Ehr.



## Generaziooneverdraag



NICOLAS SAMIR MAURICE THOMI NIELS

Du hesch s Intärne vo de Junge/Binggis gwunne. Was het dir das bedüet?

**Nicolas Moosbrugger:** *Ich ha unbedingt welle gwünne. Ich bi stolz uf mini Leistig und mini Eltere sinds sicher au.*

**Samir Takasaoui:** *Es bedüet mir sehr vill. Bis jetzt bini immer numme Zweit- oder Drittlezte worde... und jetzt hani emol chönne gwünne.*

**Maurice Reber:** *Ich weiss nid genau... ich bi sehr überrascht gsi, aber es fühlt sich natüerlich guet a.*

**Thomi Schmid:** *Bi de Binggis 1986, bi de Junge 1989. Y bi denn dr erscht gsi, wo vom Fluech betroffe gsi isch, dass die, wo in Stamm göön, nid könne gwünne. Mi Nochfolger und Seriesiiger, dr Andi Müller, isch allerdings glaub diesbezüglich usgnoo gsi. Anderi könne au e Liedli drvoo singe... :-)* Zue sällere Zyt bin y seer stolz gsi. Wenn y aber zrugdängg, isch dr legendärschti "Siiger" in dääne Joore dr Niggidom gsi: Är hett zwor "nur" dr 2. Platz belegt, aber die gross Figur, dr Hauptbryys, gwunne, will dr Gwünner e Buech über Yysebaane uf em Goobetisch usgsuecht hett. Dass säll Dotteli nüm bi dr Staine isch, bruuch y allwä kuum erwääne...

**Niels Burkhard:** *Y kha mi nümme so an Details erinnere. Das isch, glaub y, 1960 bis 1963 gsii. Y ha drei Mool hinter enander gwunne und ha derfir derfe dr Wanderbächer bhalte. Vor ne paar Joor han y dä*

*Bächer de Junge Stainlemer gschänggt. Öpper vom Vorstand het denn dä Bächer mitgno. Y weiss nümme wo ner isch und das isch schaad. Es hät uf dämm Bächer vieli Gwünner gha, wie z.B. File Lehr, Réne Vögeli, Hansjörg Ott usw. Dr eltscht Ydraag sich vo 1949 gsii.*

**Wie isch es gsi, uf sonere grosse Büüni z stoh und e Konkurränz elei z drumme/pfyffe?**

**Nicolas:** *Voreme Uftritt bini natüerlich immer nervös. Aber es isch jo nid so, als ob das mi erste Uftritt ufere Bühni gsii wär, wäge däm hani öbbe gwüsst, was mi erwartet.*

**Samir:** *Natüerlich hani Hemmige. Das vor allem, willi Angst drvor ha Fehler z mache. Aber dr Uftritt isch mr denne guet glunge. Mi Vater het e Ufnahm drvo gmacht und ich ha denn weniger Fehler pfiffe als erwartet.*

**Maurice:** *Natüerlich hani Hemmige. Das vor allem, willi Angst drvor ha Fehler z mache. Aber dr Uftritt isch mr denne guet glunge. Mi Vater het e Ufnahm drvo gmacht und ich ha denn weniger Fehler pfiffe als erwartet.*

**Thomi:** *S Intärne isch in dr Saffere gsi. Als Pfyffer hämmer im ene glaine Saal pfiffe, d Dambuure sinn im grosse gsi. Sunscht wärs vyyl z lang gange... Dur das isch me als Pfyffer nid eso im Rampeliecht gstande. (Und weiss drum nid, was e Rapsesau isch, gäll Thierry :-)*

**Niels:** *Bim erschte Mool bin y vo dr Bühni gfalle. Dasch isch no im alte Käller im Staineschuelhus gsii. Nervös bi y nit gsii. Erscht vo ni am Offizielle mitmacht hat. Dert bin y emool 10te worde.*

**Uf was freusch di, wennd an die bevorstehend Fasnacht dänggsch speziell?**

**Nicolas:** *Natüerlich ufs Trumme und Pfiffe, aber au uf d Täfeli vo de Waggis.*

**Samir:** *E Highlight für mi isch ganz klar dr Morgestraich, wenn mr alli zämme laufe.*

**Maurice:** *(lacht) uf d Stroos zgoh mitem Kostüm*

**Thomi:** *Uf dr Morgestraich... Und uf s Fasnacht mache mit de Stainekamerädli, ooni sich e Dütt drumm z schäre, was die andere 10'000 Fasnächtler mache.*

**Niels:** *Uf e Morgestraich - Staine total! Und natürlig uff unsere Zug vo dr Alte Garde mit emene tolle Sujet wo vo unserem Künschtler guet umgesetzt worde isch.*

**E Stainlemer z syy isch...**

**Nicolas:** *... e Tambour oder e Pfiffer, wo duet Fasnacht mache.*

**Samir:** *... inere Männerclique zsy*

**Maurice:** *... e guets Gefühl - es gfallt mr sehr in dere Clique.*

**Thomi:** *... eifach e Riiseglügg. Glaub nid, dass y neume anderscht no könnt Fasnacht mache... Unsere "Film" gfallt mir eifach mit Abstand am beschte!*

**Niels:** *fantastisch, will me in ere grossartige Clique isch.*



**Was reimt sich uf "Tüllli"??**

**Nicolas:** *... Füllli*

**Samir:** *[das sage mer do lieber nit - der Setzer]*

**Maurice:** *Hülle*

**Thomi:** *Ab syne glatte T-Shirt brüll y!*

**Niels:** *Hüllli und Füllli*

Rätselsytte füre Tüllli

Damit unsere Chefredagter au mol bi dr Rätselsytte drusskunnt hämmer s Niveau e bitztli abasst. Sorry Jung, s neggscht mol denn öpis wo wieder euch Junge entspricht und au fyr euch e Uuseforderig darstellt.


Sudoku

Tüllli

6		5	9	7	3	4	2	8
7	8	4		5	2	9	6	3
3	9	2	6	4	8		7	5
5	6	8	4		7	2	3	9
2	7	9	3	6	5	8	4	
4	3		2	8	9	6	5	7
8	4	7	5	2		3	9	6
9	5	6	8	3	4	7		2
	2	3	7	9	6	6	8	4

Labyrinth

Welle vo dene drei Stainlemer gässlet ohni Hindernis zu däm feine dänische Hotdog?!



S Intärne

Im guet bsuechte Kronemattsaal vo Binnige het au in däm Joor s intärne Pryyppfyffe und -drummle stattgfunde. In drey Konkurränze, leider ohni Binggis-Pfyffer, hänn sich die Junge e spannendi Konkurränz gliiferet Die drei verdiente Sieger sin dr Nicolas Moosbrugger (Tambourekönig Binggis), Samir Taksaoui (Pfyfferkönig Jungi) und dr Maurice Reber (Tambourekönig Jungi) worde. Mir hänn s Siegerinterview mit dene drei in dr Generationeverdraag vo dere Ussgoob ibaut. Spannend, was die Junge, aber au gstandeni Könige vo friener, wo hütte im Stamm oder sogar in dr alte Garde sin, dört so über ihri Erfahriga am Intärne brichte.

E grosse Dangg gilt allne Hälfer vo däm Alass; speziell em Vorstand vo de Junge, wo vo dr Kuchi über d Moderation bis zum Uffruume alles organisiert het, allne Zueschauer, de Jurore (Oli Jetzer, Andy Kurz und Däni Steiger bi de Tamboure, Beat Schwald und Roger Zehringer bi de Pfyffer) und natürlich de Teilnähler sälber.

Abgrundet worde isch s Intärne wie immer vomene bunte Oobe. Wunderbar d Ufftritt vom Stamm (mit em neue Tambourmajor) und dr alte Garde. Au d Wältpremiere vom Drummeliufftritt vo de Junge het gluschtig ufs Drummeli sälber gmacht. S Publikum het denn em Vorschlaag vom Moderator Michel Mesmer zuegstumme, dass im Juubeljoor stellvertretend für alli Ufftritt die Junge dr Wanderpriis gwünne. Einzig dr Fänclub vo dene hervorragende, wunderbaare, kreative und vor allem bescheidene Fäährläberli, wo sich daasmoll mit ihrne einzigartige Cosmic Drums hervortoh hänn, het entweder d Fuscht im Sack gmacht, oder lut buht. Aber im allgemeine Applaus isch dä Missmuet e weeneli untergange. D Fäährläberli sin ebe schiints zueversichtlich gsi, well dr Tüllli (wo bi däm Ufftritt worschiinlich eh nit drusscho wär) nit drby gsi isch. S hätt könne länge. Wie au immer; verdient hänn die Junge die Anerkennig für die tolle Ufftritt am Intärne 2013 aber uf jede Fall.